

## **Фарзандга Мұхаммад деб исм қўйса бўладими?**



11:30 / 30.06.2021 4769

Набий соллаллоҳу алайҳи васаллам дедилар: «**Исмимни қўйинглар, аммо куням билан куняланманглар**».

*Бухорий ва Муслим ривоятлари.*

«**Куня**» деганда кишининг исмидан аввал айтиладиган, бош фарзандининг исмига қўшиб «**Фалончининг отаси**» маъносидаги нарса тушунилади. Масалан, Абу Абдуллоҳ, Абу Дардо, Абу Мусо каби.

Пайғамбаримиз соллаллоҳу алайҳи васаллам кўплаб саҳобаларга куня қўйиб, ўша билан чақирав эдилар. Масалан, Абдураҳмон ибн Соҳр ад-Давсий розияллоҳу анҳу деган саҳобанинг мушукнинг боласини ўйнатиб ўтирганларин кўриб, у кишини «**Абу Ҳурайра**», яъни «**Мушукчанинг отаси**» деб чақирганлар.

Бир куни масжид девори ёнида ётган Али ибн Абу Толиб розияллоҳу анхунинг тупроққа беланиб ётганларини кўрган Пайғамбаримиз соллаллоҳу алайҳи васаллам у кишини «Абу Туроб», яъни «Тупроқ отаси»

деган куня билан чақирғанлар. Шунингдек, Али розияллоҳу анхунинг «Абул Ҳасан» деган кунялари ҳам бор.

Бизда ҳам баъзи хонадонларда аёллар турмуш ўртоғларини бош фарзандларининг исми билан чақиришлари одат тусига кирган. Набий соллаллоҳу алайҳи васалламнинг кунялари эса Абул Қосим әди.

Юқоридаги ҳадисда Пайғамбаримиз соллаллоҳу алайҳи васаллам умматларини ўз исмларини қўйишга тарғиб қилмоқдалар. Баъзилар ўйлаганидек, агар Мұхаммад исми фарзандга оғирлик қилганида ёки фарзандни Мұхаммад деб номлаш мумкин бўлмаганида, **«Исмимни қўйинглар»** демасдилар.

Қолаверса, барча Пайғамбарлар алайҳимуссаломнинг улуғи, оламларга раҳмат бўлган зотнинг исмлари қандай қилиб оғирлик қиласдиган, фарзанднинг боши касалликдан чиқмаслигига сабаб бўладиган исм бўлади?!

Бундай гапни айтиш севикли Пайғамбаримиз соллаллоҳу алайҳи васалламга нисбатан беҳурматлик ҳисобланади.

Абул Қосим деб куняланиш борасида эса уламоларимиз ораларида турли фикрлар мавжуд.

Баъзи уламолар Абул Қосим деб куняланиш мутлақ мумкин эмас, десалар, баъзилари ҳадисдаги гап Пайғамбаримиз соллаллоҳу алайҳи васалламнинг ҳаётлик ҷоғларига тегишли, дейишган.

Айтгандек, Абу Бакр Сиддиқ розияллоҳу анҳу, Али розияллоҳу анҳу каби улуғ саҳобаларнинг Мұхаммад исмли ўғиллари бўлган.

Шунингдек, Имом Бухорий раҳимаҳуллоҳ, Имом Термизий раҳимаҳуллоҳ каби улуғ муҳаддисларимизнинг исмлари ҳам Мұхаммад бўлган.

Фарзандига Мұхаммад деб исм қўйган ота-она ўша фарзандини ҳурмат қилиши, уни ҳақорат қиласлиги, мажлисларда жой бериши, юзига деб сўқмаслиги лозим бўлади.

Хуллас, туғиладиган фарзандларимизга биз умматлари учун кўп қайғурган, охиратда шафоатчимиз бўлган севиклигимиз соллаллоҳу алайҳи васалламнинг исмларини кўпроқ қўйишимиз ва ушбу исмнинг ҳурматини сақлашимиз керакдир.

***Islom.uz сайти ва бошқа манбалар асосида***

***Нозимжон Ҳошимжон тайёрлади***